



## *Dr. Emsley Tromp di Banko Sentral:*

### **“Koperashon konstruktivo ta brinda benefisio adishonal pa Reino”**

**WILLEMSTAD - “Loke a bira masha kla durante e bishita resien di e Promé Minister Hulandes Mark Rutte ta ku nos tin di bai den un direkshon stratégiko komun”, asina Presidente di Banko Sentral di Kòrsou i St. Maarten, Dr. Emsley Tromp, a deklará na e konferensia di e fundashon Pro Inovashon Nashonal (PIN). “Finalmente nos mester anda ku otro den un aserkamentu sistemátiko”.**

Señor Tromp a boga pa pensamentu inovativo den direkshon di un koperashon konstruktivo mas estrecho ya ku esei lo brinda benefisio adishonal pa tur e partinan di Reino. Eróneamente ta pensa ku Hulanda ta un nashon státiko. Durante e último 20 añanan Hulanda tambe a kambia enormemente. “Nos mester mara mas ku e Hulanda ku ta kambiando na lugá di rebeldiá kontra dje. Nos mester restablesé komo pais sigur di su mes ku bista dirigí pa dilanti i nos no mester skonde tras di murayanan kultural. Si tin problema, no tin nodi resistí kontra dje, pero purba komprend’é i resolv’é. Na lugá di wak na esun banda di e teleskop, partidonan ta inkliná na wak e kantidat inkontabel di problema chikitu for di e otro banda”.

#### **Inkomprenshon kultural**

Dr. Tromp a boga pa inovashonnan den e forman pa atendé ku otro dentro di Reino. “Nos por ta partner igual, pero Hulanda tin un tradishon largu di demokrasia parlamentario i e ta un estado próspero. E poblashon di e partinan Karibense huntu ta representá ni 2% di e poblashon di Hulanda, miéntras ku e ekonomianan insular huntu no ta ni alkansá 1% di nan Produkto Doméstiko Bruto. E realidat asimétriko aki a kultivá inkomprenshon kultural i lo rekerí hopi tempu i pasenshi pa prosésa esaki”. Esaki ta pone, segun e presidente di Banko, ku e estadonan mikro Kòrsou i St. Maarten mester lanta i mantené tur e institutonan ku ta nesesario pa un demokrasia parlamentario. Riba e tereno aki Kòrsou tin un tradishon poko mas largu, pero e isla aki ta lucha ainda pa integrá e departamentunan sentral i insular. Ademas, riba e islanan e liñanan entre polítiko, ámtenar i siudadanonan ta mas kòrtiku ku na Hulanda di moda ku lo ta difisil pa igualá e normanan di Hulanda. Tòg nos mester paga tinu ora nos bai te na e límitenan, pasobra riba término nos lo mester paga karu pa esei.

Por tin sierto opinion den komunidad ku ta basá riba kaminda e sapatu ta primi i hasta por eksagerá esaki a base di miedu òf ignoransia. Mester tene kuenta ku nos kapasidat lokal limitá i ku diferensianan di kultura. “Nos mester bai pa un ekilibrio hustu entre e proseso di tomo di desishon i repartishon di gastunan. Aki inovashonnan riba nivel di Reino por hunga un papel sentral”, segun Dr. Tromp. □